

Tesalonike nyo Tagh *Ompö Kighöni chomi Kighetu*

Amtaghata Sirimnyonto pöropchö

Ghömicho omtoghi pöropchö

1 Tesalonike ompö Kighöni chomi Kighetu

Kuke

Kiletat ketchi Wefin	3
Kuka 1	6
Kuka 2	14
Kuka 3	20
Kuka 4	24
Kuka 5	30

Tesalonike nyo Tagh Ompö Kighöni chomi Kighetu

NG'ALE CHOMI ORI

- Woopta nyo tagh – Tilyantan nko Töroröt (Ng'ong'ut 4:11, 1 Kor 1:9). Kursyo Töroröt nyo pö tagh ompö nyinte, “Ighat ntakwit Kristo” (Kitoröto sörunöt)
- Nyopö ondeny - kimi ato akong'a nko Kristo (1 Kor 1:30). Ighan nyo rel (2 Kor 5:17) Ighat nkakwit Kristo ompö kighöni cho tökiyetu (kitoröto kitapanat)
- Nyopö sömök - kutwayta kegh mikulögh nyo tiliil (2 Kor 3:17-18). Mikulögh nyo Tiliil ki mikulögh nyo pö man – Yoa. 16:13-14). Tounöt kanisa (kanisa ki pchori aki kitoröto man (1Tim3:15)
- Kitatamata ng'alechete lapoy
- Woop nyo tagh 1-Kitoröto sörunöt – (Ighat ntakwit Kristo)
- Mönö'ng' o kighöni kipö kisich Tilyantan nko Töroröt kilenyona makatenyo nyo wow ki keneta piköcho cho sömönöy ng'alechi kisich tilyantan nyo leküt nko Töroröt. Tökiyetu chii tökisich tilyantan nko Töroröt, kimi kitoröto man nyo michini kenet tökipköchi kitoröto man cholata chi.
- Arorwatino Töroröt - Chomyenyi, owesyenyi kisonötenyi, kinkitötenyi nyo kighanka tikwil, mii nyinte woop lapoy, mantanyi, möwöghökonye nyinte, wököy ng'oki, ghanate nyinte.
- Ng'oki ptang'eng'möt, nyörkölelyenyi memukonye ntökisöri kegh, nko makatenyi nyopö sörunin.
- Töroröt onkit nyo konu sörunöt
- Nko lökoy cho karamach.
- Nyopo odeny 2 – kitoröto ng'otat\kitapanat (king'eta Ighat ntakwit Kristo ompö kighöni nyomi kiyetu nko kitatamata yiyöt nyo rel)
- Otini kikiyi chii nyo pö odeny, kiwaghaka otini lawel söpontanyi, otini lawel kiliku nyinte nyu mömpö Töroröt.

Kiliku chichī tikwin lapoy cho köpö Kristo. Kilenyona kitomö kīpöghisyechī Töröröt kīmichini kīpköchī lö ochī ng’o ompö Kristo.

- Nyopö sömök 3 - kutusaita kegh mīkulögh nyo Tiliil akīwö kanisa. Wöghöko söponpo chii otini keghan Yeso ompö sörunöt, ompö osis lapoy kīmi nyinte kīyetu ompö Echotyön.
- Ocheywo mīkulögh nyo Tiliil kī kuntöghoghchī, kīpagh, Kīrip, akuchichima man.
- Kerip kighanat ompö mīkulögh nyo Tiliil tökupuntö kiyomisutkachi ompö Yeso Kristo.
- Kī ng’anyata wölonā kitwayta kegh kanisa nyopö tagh mīkulögh nyo tiliil.
- Ghanate mīkulögh nyo tiliil ompö söponwecha yee kile wölo kilata ompö puku Ighisyewut.
- Kimwa wölo lata kanisa nko pöghisyewutkachi.

Tesalonike nyo Tagh Ompö Kighöni chomi Kïghetu ~ Kuke Nyo Pö Tagh

A. Kitorötenyi



- Palalyan nyete nyo kikirchî Paulö kanisa Tesalonike. Kinya Paulö kîrutochî kanisanete ompö rutoghtanyi nyo pö odeny ompö amtaghtanyi.
- Otini kirutö wölini Paulö kinomnyotö nko Timoteyö nko Sila.
- Ompö rutoghtanyi nyo tagh - kinomnyotö nko Parnapa nko Markö cho

kile kong'otichi.

- Ompö rutoghtanyi nyo pö tagh - otini kimi Perka kî kipîstö Markö Paulo nko Barnaba akîwö kîmîla kutany Cherusalem.
- Ompöwölo kipîstö Markö chane, kimöng'örökyînye Paulö nyinte, otinö kimi chane kîtötöy rutoghtöng'wa nyo pö odeny, kîwö Parnapa kîmito Markö wölo kimachamnye Paulö.
- Kimöchomnyechînye chane ng'ölyontononi ntökîtenö kîpesyö Paulö nko Parnapa, kîwö Parnapa onkî wölomi Markö kîwö Paulö nyenyi ore onkî kîwö Paulö kînyorî Sila nyo kile kintöghoghin ompö Cherusalem. Kîkany kuwonyö osiswö chote, kîlenchî Paulö Parnapa, "Nya kemîlonchenö atö (Ighisyewut 15:36-41)
- Ompö rutoghpö Paulö nyo pö odey ompö amtaghtanyi, kîkînam nyinte akerat nko Sila ompö koro Pilipi, otini kîkityokî chane kîpa ng'at kutany koro Tesalonike.

1Akwotini kökîkîpa kuwerata kanastina Ampipoli nko Apolonia, kwit kanasyanta Tesolonike, kimi wöloni köpö saghat.

2Kilî Paulö köyay pö saghat kîle wölo kilata otöptanyi nyo pö kînomyö, kiteptep kegh nko pîchoni



ng'ala kikirut ompö osiswo kiminy kënyil chole sömök.

3King'ong'chï akuporchï lasiny ompö kikirutchoni lö kimichï Kristo kuwong'wï akututunö wölo mii piich cho kimeghö,

kilenchï Paulö chane, “Yeso noni omwowokwa nyini lee

Kristo.” 4Kughan walaka ng'ala Paulö nko Sila, kicham tikwil tuyot nyo wow nyo pö kriktin cho kisoghöy Töröröt, nko koru piich chole kintöghoghï. Igh. 17:1-4

- Ompö koro Tesalonike kï kipka piich cho chang' kughan Echotyön kitagh walaka akïwöch kighöni.
- Otini kipistö chane kighönichay kïsch ng'at Paulö yang'at ompö mikuliskökwa ompö kireyat nyo kikireyöy kighöni.
- Kilenyona nyu kiyonta Paulö Timoteyö kïwö kukil kighöni ompö koro Tesalonike.
- Kitas tagh Paulö nko Sila kipegha koro Atene ntakwit Korinto. Nyo tang'ogh kwiti Timoteyö akimwowi lö mii pipö Tesalonike kuletöy nyo karam.
- Otini kilim chane ng'alechoni karamach kukirta Paulö palalyan.

“Kengwina palalyantani ani Paulö, nko Silpano, nko Timoteo, kikirwokwa pipö kanisa chomi kanasyanta Tesalonike, cho kaliki pipö Töröröt Papyonyo nko Echotyön Yeso Kristo. Nya, kitöpö nko akwa pöropchö nko kalya. (1Tesalonike 1:1-2)

- Lenyay kakemwagh atay lö kyomtoghin Paulö nko Sila. Kyomchï chane kanasyanta Tesalonike. Mii yee nyu Paulö kukirchini kanisa (piich cho kikekur) Chole pipö Tesalonike chomi ompö Töröröt papo nko ompö Echotyön Yeso Kristo. Poru nyoni lö piich chane cho kikughan akimi ompö Kristo, akimi oripö Kristo. Piich cho kikilinyö nko Töröröt ompö kighanateng'wa kikulowitö kegh ng'winyi ng'okï, kikepörteghchï kimurtewon nko Kristo, kikil chane Kïrip kighanateng'wa kirkegh kömi kichopata kong' nko ng'ala asiltin.

- “Nya kītöpö pöropchö nko kalya” ng’wino kalya nko pöropchö wölomi Töroröt kuweri Yeso onkīt Kırkegh kakıtach pıchoni pöropcho Töroröt nko kalya ompö sörünöt, kimököy Paulö kulet tagh chane kīsöwı akıyetı ompö ng’ala Töroröt. Muko nyu ng’alechoni otini kösıch chane kinkıtunöto Töroröt (2 Pet. 3:18)
- Kimwa Paulö lö atasa tagh oyokyini Töroröt sörö ompö chane (kighöni) kırkegh kömi kireyata nko kinetat cho ng’örı, wölo kigh nyo karam kī kıtas tagh chane kıkilyö ompö kighanateng’wa ompö pöropcho Töroröt.
- Kinkıt Paulö lö kıkönöteng’wa Töroröt onkīt akutwayta kegh Töroröt kukil chane.

B. Kikil Paulö Kighöni

Ompöwölo kinonocha Töroröttınyo akı paponyo ompö wölini opöghisyeghonekwa kighanatengwo kılıkı wölini kighakwa chomnyenkwa opöghisyeghenö ompö owesyö kılıkı, nko wölini chıchımate kılıkı kıkönötenkwa nyomi Echotyontenyö Yeso Kristo. 1 Tesalonike 1:3

- Kighyong’chö lasiny pipö Tesalonike ompö osiswo kichopat (1 Tesalonike 1:6, 4: 7-8). Kicham Paulö chane ompö kighanateng’wa nko pöghisyeng’wa nyopö chomnyot, mıkukönöt nko kıkönöt.
- Kinya Paulö kıng’alana Ighisyewutkökwa nko kighanateng’wa.
- Kikonı kighanateng’wa ompö Kristo poghisyewut cho karamach.
- Poru pöghisyewut pö chii kighanatenyi. Poru kighanatencha Ighisyewutköcha. (Yakopo 2:14-18)
- Kitö anka nyo kimwa Paulö nyo poru kighanateng’wa kī pöghisyeng’wa nyo pö kighanat, kighanateng’wa ompö ighisyewut.

- Chomnyogh kī kareran nyopö akwa mīkulögh nyo Tīliil ompöwölo kikesörī, tīng’eto mīkulögh nyo Tīliil, kuporī nyu lö kipö man chomnyeng’wa (1 Kor. 13:4-7)
- Kimwa ng’at Paulö paraku mīkukönöteng’wa nyo pö kikönöt ompö Kristo, Ighisyewut ompö kighanat nko chomnyeng’wa, nko kikönöt nyo konu mīkukönöt.
- Kitö pipö Tesalonike nyakanat kikönöteng’wa ompö Kristo, ompöwölo kikesörī chane ompö ng’okikwa nko ompö kirwok, akisöwī lö kīchī kiltit ompö taghpa Töröröt akunkit lö mito yee nyu Kristo ompö chane.
- Kīlenyona kīrkegh kikichop kong’ chane, kī kinyorī chane kimīny ompö wölomi Töröröt akīghömchö lasiny ompö kighanat.
- Otete kīmitö kechilöy akekilöy piköwalak, anyī ng’ölyonte nyo mīchini kenan. Mīchinecha kemīta piich kīpa wölomi Töröröt (Isaya 26:3).
- Otinö kimwochī Yeso kinetankachi lö kīpetöy kerötanīn akepartanīn kimurtewon, kiskus chane ng’ölyontononi.
- Kīrkegh kilata nyoni, kikil nyinte chane akīlenchī oyonwokwa king’örokin nyo möpistonokwanye, amīlenan asakong’a ompö akwa (Yohana 14:1-13).

Kinkitöcha tupchenichu lö, chömokwa Töröröt akakilakwa alikuna pikachi. Ompöwölo kikipwokwa Lökooy cho karamach akimelö ompö ngal opin, wölo kiripi owesyö nko Mikulögh nyo Tīliil, nko kinkitöt nyo onkitökwa mantanyi lasiny. Onkitökwa otöptöncha atakinye kikimitecha nko akwa lö kikighacha lenyoni ompö tösunötenkwa.(1 Tesalonike 1:4-5)

- Kitor Paulö ompö kichweratanete pö ang’wan kukil pipö Tesanolike kunan lö kimakīlcha chane Töröröt wölo kikīl Töröröt chane.

- Otini kyamta Paulö lökoy cho karamach ompö Tesalonike, kī kitö chane mīkulögh nyo tiliil nyakanat kīsōwī man akughan kesoru nyu chane.
- Līku man tikwil ompö acha lenyoni mökichikinechanye piich kughan kīiigh anka tikwil. mömīchininye keghanacha ng'öghomnyencha anta owesyencha nyopö ng'alanat, wölo king'ölonwecha mīkulögh nyo tiliil ompö nyakanat nko man.
- Mīkulögh nyo tiliil onkīt nyo mwochini chii akīng'ong'chī ng'okichi (Rumi 1:6) akughan Yeso Kristo lee sörünintenyi. Nyete nyu nya kimwa Yeso lö oghöy. (Yoana 16:8-14)
- Kiwontoy yee nyu lö lökoy cho karamach kī melö chong'inpö ng'al, wölo ng'wīno owesyö nyo söru, ng'wīno mīkulögh nyo tiliil akung'wīnöy nyakanat nyo wow lö asakong'a kīmöng'isyecha nko Echotyön. Kimwa Paulö lö man ng'alechī ato irosanyi ompö söpeng'u.
- Kitö mīkulögh nyo tiliil pipö Tesalonike nyakanat nyo wow kunkītī man kīrkegh kimi koronini wöchötö nyowow nyo kīkīwöchöy piich chole kīghönī. Kitīny chane ng'öreyö kughan ng'ölyonto Töröröt akīlikī rīpan pö Paulö nko Kristo (1 Kor. 11:1).
- Kīgh nyete nyo mīchinech kenone otini kyomchini chii ng'ölyonto Töröröt, mīchinech kepestateghena mīkulögh nyo Tiliil atakīlikī pikö walaka rīpi Kristo lee otino kīchī lata.

Kilenyona, kalikukwa yenyu körkeyīn nyo karaam nyo pö cho kikughan Yeso ompö Makedonia nko Akaya.

1 Tesalonike 1:7-8

- Paulö, Sila nko Timoteyö - cho kintöghoghchī mīkulögh nyo tiliil akīrīp pipö Tesalonike körkeyīntöng'wa, kīlikī chane kīghönī cho kintöghoghchī mīkulögh nyo tiliil tikwil.
- Kīlikī chane körkeyīn nyo karam akīrumtö söwintöneng'wa ompö kaniseni walak ompö koronini.

- Kichichimate lasiny pipö Tesalonike otini kimi kereyöy chane. Kiparta chane söwintöneng'wa nyopö kighanat, kughan nyu pikö walaka tikwil Töroröt.
- Kirumï söwintöno pipö Tesalonike ompö ng'winy kimikul, akilikï körkeyin ompö kaniseni walaka. Kirumï lasiny kighanateng'wa, kimang'alananye Paulö kighanateng'wa tya ompöwölo kisüwa lö mii chane kiripöy ng'ala man.

Ngölono piich tikwil wölini kyatachtechakwa otini kikirytechicha akwa asagh Töroröt, apöghisyechi Töroröt pö man nyo söpöy, a akay werinyi nyo ngwino yim wöloomi Töroröt, werinyi Yeso nyo kitutunö wöloomi meghon, aki nyinte nyo sörunenecha nörekyo Töroröt nyo ngwinöy. 1 Tesalonike 1:9-10

- Kimököy Paulö kunonchini chane wölini kitachta chane lökoy cho karamach nyo kiwaghach söponwekwa.
- Kinonchi mikulögh nyo tiliil ng'ala man nyo kigh chane kipistö saghata körkeyintin akughan Töroröt, akukön werinyi Yeso ompö milaghtanyi nyopö odeny.



Tesalonike nyo Tagh Ompö Kighöni chomi Kïghetu ~ Kuke nyo pö Odeny

A. Kepestata ompö machata Töroröt

Sörömuto choni nyu, tupchenichu, kyanetekwa kegh acha otöp nyo chamate Töroröt. Aki otöpnoni nyo kyotïngetekwa akwane. Asoghokwa achikinokwa ompö kainata Echotyoon Yeso lö atasa tagh lenyoni. Ompöwölo onkïtökwa kiyomisutkchanya kyatachakwa ompö Echotyoon Yeso. 1 Tesalonike 4:1-2



- Kimöchöy Paulö pipö Tesalonike kïpa kile wölinö möchtoy Töroröt, lee otini kikineta chane, atökïyetu osis nko osis, ompö Echotyoon.
 - Muköy löne chii nyo kakughan Töroröt tökïwesitö lee otino möchöy Töroröt? Kïwesitö nyinte ompö kïghanat (Epraniya 11:6)
 - Ting'eto por punyontön nko Töroröt, nyo otinö tökïwestegho chii por, kïmemukönye ntakwisuna chichoni Töroröt.
- Ompö kichwerate nyopö odeny, kï kimwowï Paulö lö ompöne tökïmïchini kïpesta chane ompö kïghanat. tökïlinyö chane nko Kristo osis lapoy ata kïkarkegh chane nko nyinte Yeso (Kalatya 4:19).

B. Kelöwön

Machata Töroröt nyoni ompö kwa! Möchokwa nyinte olikune piich cho tïlilöch, nyoni kï kelowit kegh nko atop nyo pö cheporesnan. Mïchinokwa cho ochï mirön onkïtune wölo töptoy cguu anka tïkwil nko korkenyi ompö oor nyo Tiliil akïpo könyit, melö ompö pïrchnogh pö poor kile wölo lata pipö pontoon, piich cho menkïtcha Töroröt. 1 Tesalonike 4:3:-5

- Ompö woptönetenyi, kuporu lö machata Töroröt nyetenyi kilöwönecha anta kutapanech kelikuna cho tililöch. Keliki piich cho tililöch ki or nyoni nyopö löwönöt. Tösöy nyu tagh ng'ölyontonete pö kitililöt ompö söponpö chii nyo kikughan ntökitenö kiwö nyinte yim ompöwölo napata kegh nyete.
- Kilenyona nyu poru lö machata Töroröt kiliki piich cho tililöch cho kikelöwön, melö kimöng'isyö ompö cheporesnan anta ng'oki walak lapoy, wolö kimöng'isyö ompö tililyö nko konyit wölo melö ompö möchutpö por.
- Mukisyot chete ompö owesyö mikulögh. Rumi 6:11-14
- Kepestegha mikulögh kumuko ompö kighat, toro kighanat ompö kimurtewonto Kristo.
- Otini kakesörwecha mantanete ompö kighanat, kipköchinecha nyu kityakata Kristo nko paytaghpa p or. (Kalatya 5:16)
- Lenyinö netecha mikulögh ompö kighanat, kisöwunecha lö kikeparteghcha kimurtowon nko Kristo, ntöghoghwecha kinkituno mantanoni lö kikelikucha ighan cho relach (2 Kor 5:17).
- Lenyona konecha mikulögh nyo tiliil owesyö nko machat kinkitunötencha ompö Kristo Yeso otinö kakonyitöcha ng'ölyontenyi lasiny kesöwucha nyinte ng'at lasiny (2 Kor3:18).
- Machata Töroröt nyete ompö kighönin anka tikwil.

C. Melisisyö

Mömichininye kilelchi chii tupchenyi ompö ng'ölyontononi, anta lis nyinte ompö kigh anka tikwil. Kikemwowokwa lenyoni atole tagh, akenyilecha yee keriwokwa ngat lasing lö chopöy Echotyoon piich kong cho ighöy lenyoni. Molenchi kegh kikurchecha Töroröt otöp nyo pö cheporesnan, wölo kikurchecha tililyö. Kileinyona, nyu, anka tikwil nyo töghöy kinetutyonetenyi, kimelö katagh chii wölo katagh Töroröt nyo konokwa mikulöwunyi nyo Tiliil. 1 Tesalonike 4:6-8

- Kikir Paulö lö mömīchinechanye kelīsisyenö, kelīse tupchenicho, ompöwölo möchömönye Töröröt ng'okī. Ghanate Töröröt nyinte nyo ghoktoy ghöghityö (Rumi 12:19).
- Mentö kikurchecha Töröröt simyontön. Mökurchechanye ptekwernön nko möchutpö por, wölo kikurecha kelikuna cho tililöch ompö kinkitötenyi (2 Pet. 1:3).
- Kimwa Paulö man lö chii anka tikwil nyo töghöy kinetutchi kikonī Töröröt akilīs cho tupchö kī kitagh nyinte Töröröt.

D. Chomnyo Tupchotīn

Moting'etanye machat nyo okirwokwa ng'al cho pörtoy chomnyogh pö pipö Kristo. Kakunetakwa Töröröt nyinte, kilenyona, michinokwa achama kegh akwane. Amitekwa nyoman oghöy pöghisyononi pö chomnyogh ompö kwenu werköcho lapoy chomi makedonia kimikul. Nkanyoni kichilokwa werköcho lapoy chomi makedonia kimikul. Nkanyoni kichilokwa werköcho lö, okilö kegh lasiny. 1 Tesalonike 4:9-10

- Kimwa Paulö lö mominye kīyo tonetan pipö Tesalonike ompö ng'ala chomnyogh ompöwölo yong'öy kegh chane, ompöwölo kikunet Töröröt chane kwich lenyoni.
- Chomnyogh kī akong'a nyopö okinto mikulögh nyo tiliil. Netecha mikulögh kechomnyenö akeyang' pikö walak.
- Kimwa Paulö lö kiparta chane chomnyot ompö kighöni walak cho kimi Makedonia wölo kitas tagh Paulö kimwa lö michini chane kulet kuparta chomnyogh lenyona.
- Möminye rörchin ompö chomnyogh nyo mököy piich, wölo rumu rörchin ompö mikulisköcho.
- Tokilikucha pipö por, kimīning'itu chomnyencha, wölo atokilikucha pipö mikulögh, kuyinuno chomnyo Echotyön mikulisköcha.

E. Nya kighamok/ Osikö ghamat

Amacha lasiny otöp nyo tingtono tatat, momukchini onetöy pikö walaka wölo kötedoy tikukwa, agha akwane pöghisyengwo kile wölanye kikinya kemwowokwa atole tagh. Atamucha ompö aranoni osikwenö konyit piich cho tomöcha kughan, atömökirorichook ompö kigh anka tikwil. I Tesalonike 4:11-12

- Mwoghöy Piplya ompö kichwerata 11 lö kanya kiliki machateng'u möng'isyenö ompö söpeng'u, "Iyang pöghisyewutköku apöghisyeghö moriku". Poru nyoni lö kicham kighöni cho kimi koro Tesalonike walaka kiliki sosen. Kimöchöy kënyoru piko walaka omisyewut këpuryö kigh nyo kegh chane. Monkitönye lö ompöne tökumpur chane lenyoni. Töptoy kinan chane lö mïlo Yeso lawel nka nyinö kimpur këkönyisyo kwile.
- Keröto Paulö ompö ng'ölyontoni lö ripö söpontöng'u, Igha pöghisyewutköku ompö moriku, kë kimi nyinte kukilöy kighöni chopö Tesalonike takiliki chane körkeyin ompö piich cho meghönotcha.
- Ato ntöghoghwecha por, kë mominye kigh anta sisin nyo siwiyi piich cho meghönotcha ompö acha, wölo atokimitecha ompö mikulögh, kuporu kegh otöp nyo karam ompö achaa.
- Atokiting'etecha kighanat, kilö Paulö mökichopecthanye kigh. Konecha mikulögh owesyo nko makat keghacha makatenyi (Pilipi 4:11-12).
- Atokimitecha ompö por këmöghömechanye tikwin wölo kitösecha tagh kepürchini.
- Kikitep asista anka chii nyole sikön lö ata ropiyen cho töptoy ghöminyi? kiwal chichay lö, "Ntakatasa ropiyon akong' kwile."

Tesalonike nyo Tagh Ompö Kighöni chomi Kighetu ~ Kuke Nyo Pö Sömök

Kitutunöto piich cho kimeghö ompöo Kristo

- Poru lö pipö Tesalonike walak cho kikughan Töröröt kī kikönöy lö atomila Kristo kīcheng'öy chane kīpa yīm.

Werköcho, kīmöchokwa onkitune ngala man ompö piich cho kameghö, mömichininye owuronchenökwa ompö chane, lee pikö walaka cho puryö kikönötö söpoon nyomi yīm. 1 Tesalonike 4:13

- Rumunote ng'at nyete lö atoma nyo kikughan Töröröt ompö kanisanete pö Tesalonike, kī kiloksot chane akusus kegh lee ato mökututunye nyinte ng'at.
- Toma chii nyole tilyencha anta kong'encha nyo kikughan kewuronchonecha wölo kīting'etecha kikönöt lö kiryomecha nko nyinte asakong'a ompö yīm.
- Ompö por kesiwiyecha lö mökeryomechanye nko chichoni, wölo ompö mīkulögh kenkītöcha lö kiryomecha nko nyinte ompö yīm.



chii

Kitīngetecha kighanat lö kima Yeso akututī, aketīngetecha kighanat lö mītu Töröröt nko Yeso asīyech piich lapoy cho kimeghö akughanate nyinte. 1 Tesalonike 4:14

- Nane ompö puku 1 Kor. 1:30a lö, kikelinyecha nko Kristo, kiyini kigha ompö Yeso kwigho ompö achaa tikwil lenyini.
- Kima nyinte, achaa tikwil kemeghsonecha, kitutu Yeso aketutunecha tikwil, mii yee nyinte Yeso kumpuröy ewu tagh

nyopö papo. Kitutunecha tikwil asakong'a ompö por aketakacha porwöy chorelach chopö yim.

- Ompö kichweratanete pö 14, ki mwowecha lö cheng'öy Töroröt chane lapoy chona kimeghö ompö Kristo.
- Otini kama kighönintö, kipesyö söpontanyi nko mikulöwunyi nko portanyi, akī otini kanyapana ng'at Kristo, kuyokikegh söponwo pichay kimegho nko mikuliskökwa tikwil aketutu porwöyikwa, kutuyö nyu Kristo porwöyikwa nko söponwekwa nko mikuliskökwa kiliki akong'a.

Kimwowokwa yee nyu kigh nyo kimwa Echotyoon nyinte; nyo poru lö mökinyoghechanye piich cho kimeghö, cho tökesöpchoye asisini milo Echotyoon. Ompöwölo rökuno yim Echotyoon nyinte, nko kiteghat nyo pö kiyomisöt nyo pö kuti malaikayan nyo wow, nko konti Töroröt. nyoghöy piich cho kimeghö, cho tökesöpchoye asisini milo Echotyoon. Ompöwölo rökuno yim Echotyoon nyinte, nko kiteghat nyo pö kiyomisöt nyo pö kuti malaikayan nyo wow, nko konti Töroröt. Nyoghöy piich cho kimeghö cho kighanate Kristo kututu tagh 1 Tesalonike4:15-17

- Kitowī Paulö ompö yeteyi kutatam lö ng'ölyonto Töroröt nyete, lenye nyete wölo king'ong'untö Töroröt kwicha.
- Ompöwölo Töroröt nyo kimwa lö makwigha lenyete, keghonecha akesich nyakanat lö ighöy Töroröt nyo mötiny lee otini kamwa.



- Kimwa nyinte Paulö tikwil lö ng'winöy Yeso Kristo tikwil ompö achaa.
- Porwecha ng'at nyete lö ting'eto nyinte Yeso, yang'at nko chomnyot ompö monechi ompöwölo kötöyom nyinte chitanka kung'win kicheng'echa wölo kilö ong'winan ante. Yeso nyo cheng'öy.
- Otini köchögh konti kilim monechi opin aking'itönchi nyinte.

- Kīmwa Paulö ompö yeteyi lö nyoghöy chane cho kimegho ompö Kristo kututu atolapoy kenomnyotecha cho kīchīsötot nko chane kitaroch Kristo ompö mīröt.
- Atolapoy kempuröcha nyu nko Kristo kokay.
- Möminye kīgh nyopö ng'öreyö kenkitunöcha lö kīpetecha asakong'a kemönyöy nko Kristo wölini lee yīm kokay nko kokay.

Nyo Michini okilenö kegh ngalechī 1 Tesalonike 4:18

- Kīgh anka nyo kamwa Paulö ompö yeteyi ng'at kī kikönöt nyole nyincha ompö Kristo.
- Kikönötonete nyay kamwa Paulö lö okilenö kegh asaghsagha kegh.
- Ompö mīkulögh ketopönecha Kristo nyini lee kikönötencha.
- Ompö por ketönecha kikönötencha paraku tikwin walak kīsiir ketönö Töröröt.

Tesalonike nyo Tagh Ompö Kighöni chomi kighetu ~ Kuke Nyo p Ang'wan

A. Kiteghunöto king'winata kirwoko Töroröt.

Tupchenichu, möminye machata ani akirwakwa tonkitunö ato ighisyot tikuchi. Ompöwölo onkitökwa akwane lö itu Asispa Echotyoon lee choriin nyo ngwinöy oghö kween. | Tesalonike 5:1-2

- Ompö wopetenyi, “asis pö echotyoon” kuporu osis cho tökipkonöy anta cho tökipinu otino kökonä Töroröt sitöt anta konä kisoyönöt.
- Kimwa Paulö lö kipköchä pipö Tesalonike asispa echotyoon nyo ng'winöy lee chorin nyo ng'winöy ogho otino möminye chii nyo kekönöy.
- Asispa Echotyoon kää melö asis akong'a, wölo pöroyin nyo wow.
- Towuno pöroyinoni otini keng'win Kristo këcheny monechi ompö ng'winy, akuwanta kegh otini kenyar Töroröt tikwin lapoy akutor kwich yim nyorel nko ng'winy nyorel.
- Otete këmitö kenetöy key, kemuköy nyu kesöwunö lö ekäine nyo igho ompö pöroyinoni.

Atomi piich këlentöy, “Kamanate këgh anka tikwil” wölo tökinyini lawel, kuchumchä chane wirata! Itini chane nyaril nyo mutiny, akimöminye chii nyo kekönöy, lee wölaye itini korka nyo lusiyi kichir, akimöchiwitöcha pichoni. | Tesalonike 5:3



- Ng'winöy asispa Echotyoon ompö oor nyopö töng'önchin ompö piich cho meghönotcha ompö ng'winy.
- Körokegh asisoni nko osiswo Noa wölini lata ompö körkeyin.
- Kitagh piich këter kiteghunöt.

Kicham chane kwich kigh anka tikwil nyo kiswiyi chane lö karam, akilimta kegh lö kimito nyo karam. Wölo otinö kimwa Töroröt lö kikwitita pöroyin, kuchumi rop kitöng'önchi pichay.



- Körkeyintanka ki Sodoma nko Komora, kimeng'itnye piich kigh nyo kiwetöy Töroröt kwichöy, kichömöy piich king'örökyini tiku ng'winy cho wonso.
- Kimukchi tikwil Lutu kuteghchi akirirchi kapikoytinechi, wölo kitor chane kirorochi nyinte akimeghancha ng'alechoni.
- Wölo king'win nyu ma kitöng'önchi chane.
- Ompö yeteyi lee kichewerata sömök, kilö Paulö ng'winöy asispa Echotyön kiting'eto piich otöp nyo lata nyoni.
- Nonöy chane lö kalya aki karam ng'ala. Wölo asakong'a ki cheng'öy Kristo kanisenyi kicheng'o ng'winyinetenyi, kutor nyu kiwurata.
- Kemusto Paulö nyete kichir pö kama moning' atay lusi.

Wölo momitekwanje tiwin chole akwa tupchenichu, nyo muchöy Asisini kumirokwa lee choriin. Ochikwa lapoy pipö löpoyin, cho ochi pipö pöghet. Melö kichicha pipö oghö anta cho pö tiwin. 1 Tesalonike 5:4-5

- Kimwa Paulö lö mokemitenöchanye "tiwin" mökechichanye sölwöy ompö kenkitunö man.
- Kiting'etecha manpö ng'ölyonto Töroröt kinkitöcha kiyni kimwa Töroröt nyinte lö igho "asispa Echotyön" nyo tökung'winöy, mötinye nyoni kwighecha kemighyenö lee pipö ng'winy cho meghönotcha.
- Kimuny Noa ompö puseryon nya? Kiteghchi Töroröt nyinte, kiter akughan.
- Kimung' Lutu nya? Ewo kiteghchi Töroröt nyinte akumit kiweghö koronini.

- Lee otino kilata ompö Noa nko Lutu, kī lenye nyoni ompö acha tikwil kighönecha amökemighyonechanye tikwil nyoni kīny.

Kīle nyona, merokonye pruyenökwa kīle pikö walaka, mīchini kechikonchenöcha, akeriip kegh rusot piich atay lee oghö; akwotoni lee nangat nyo tömesyot chane. 1 Tesalonike 5:6-7

- Ekī lentoy nee chii köny atokīmwochī lö ng'winöy chorin kong'u asinö kīwiröy akīchor, akutor chichay kigheghsyö akītamas akīri?
- Kīmwoghöy yee lö chīrer nyinte? Ewo nyoni kīny.
- Atokīpestegha por, kīlata chichoni mökinkītunye king'einata Echotyön, akekarkegh nko piich cho mii tīwīn akemīghyot ompö king'wīnatenyi.
- Wölo ompö mīkulögh, kīpköchinech ng'ala akechī chikönchote, kekönyöy mīlaghto Echotyontenyo.
- Kīsīköy ng'at yang'at ompö piich cho tomöcha kesörī, akesīkecha yang'at ompö mīkuliskökwa, aketeghchī chane ompö king'wīnata Echotyön.

Wölo kīchicha pipö pöghet akīmichinecha keripö kegh. Mīchinecha kelacha kighanat nko chomyogh lee longa nyo kītechtoy; nko kikönöto söpoon lee akope. Melö kikīlecha Töröröt tökewong'unenö nörekyenyi, wölo kikīlecha töketacha sörunöt ompö ara Echotyön Yeso Kristo, nyo kimeghenecha atökesöpchenöcha tikwil otini keti nyinte, kīrkegh kötökemitenö anta kökakewonyö otini keti nyinte. Nyo karam nyu okilö a ang'arach kegh akwane nko akwane, kīle wölini omitekwa oghöy otī lee yee. 1 Tesalonike 5:8-11



- Piich chopö Löpoyīn, chona möng'öy ompö Löpoyīn pö Töröröt kunkīt lö ompö nee tökīsöpsot chane.

- Mwoghöy Paulö ng'at ompö yetenyi lö piich cho karamach kinonsyewutkökwa akikulach kighanat lee lang'a nko chomnyogh nko kikonöto sörunöt nyo lata körtewonto möt.
- Chomnyogh nko kighanat kī akong'a nyopö okinto mīkulögh nyo Tiliil. Atokipestecha ompö mīkulögh kepestechecha ng'at ompö chomnyogh nko kighanat, sīköy nyu mīkulisköcha nyakanat lö kisörunenecha nörekyyo Töröröt.
- Kilim Paulö kimwa lö mökilechanye chii lö töketacha nörekyyo Töröröt. Wölo tökisörwech Yeso Kristo nyona kima ompö achaa.
- Kilenyona lee kighonī, otini kamla Yeso, meytönye lö kötökesöpsone ompö por anta ewo, wölo kisöru kighonī löwīr ompö nörekyyo Töröröt nyo ng'wīnyö akemöng'öcha nko Yeso kokay.
- Atanye kitomönye kiyoni Töröröt puseryon, kinya kuros lö mönyorīnye Noa nko katanyi kirwoko Töröröt, kigh lenyoni kīkörchī nyinte nko katanyi oripö nkadīch.
- Otini kitomönye kurwokyī Töröröt Sodoma nko Komora, kinya kīyonī malaykenichi kuntöghoghchī Lutu nko tipichi kīpegga kanasyantanay.
- Kītoma kurwokyö Töröröt ng'wīny, kīnyoghöy kīcheng'öy kanisenyi ompö ng'wīny tökisörwech ompö kirwokenyi.
- Kilenyona, ompöwölo kiting'eto nyakanat nyo wow ompö sörunöt, kīmīchinecha kekilö kegh akesaghsagh kegh.
- Kirul ng'wīnyī, kikunyara akīchīpö ng'wīnya ompö ng'okī akīmökītīnye kemony ori.
- Netech ng'ölyon lö nyorisyot tikwin, wölo mii kung'wīnyö asis nyona ng'wīnyö Echotyontenyö nyona talas akīchömecha, ng'wīnyö nyinte ng'wīnyinī pö nyörilwok nko ng'okī tökemitenö nko nyinte kokay.

Tesalonike Nyo Tagh Ompo Kighoni Chomi Kighetu ~ Kinetutyo Mut


- Ompö palaltina Paulö cho chang' kinonchī piich wölini tīng'eteghto chane ghömīchö nko Kristo, ighan chane cho relach ompö Kristo akīting'eto chane asil nyo rel.
- Akwompö mantanoni, kitastagh nyinte kutatam möng'ononi tenate ompö asil nyo rel.
- Anyi wölo mīchinech kenetītena piich, nyo tagh, kinetecha lö ng'o chane ompö Kristo, atalapoy kumpur chane ompö oro mīkulögh, nyopö sīrim kīmany chane möng'ot nyo pö kighanat.

A. Poy

Kisoghokwa lasiny, tupchenichu lö okonyitö piich chomi kīpöghisyewokwa, cho ntöghoghchinokwa akunetokwa otöp nyo roko pipö kristo kīrip. Okonyitö chane tya, a acham chane ompö pöghisyeng'wa nyoni mii kwighöy chane.atipi ompö kalya. 1 Tesalonike 5:12-13

- Kikir Paulö lö mīchinecha keyong'e akekonyit poy cho sīng'enecha, kekonyit akeyokyī sörö ompö pöghisyeng'wa.
- Mīchini kenkitö lö kitö Töröröt poy paytagh ompö kīrip akuros kiletata mīkulögh ompö kanisa.
- Piich chane cho ntöghoghchini mīkulöwu Törötöt akuntöghoghchini pikö walak kwigh lenyini.
- Kimwa Paulö lö mīchinecha kekonyitö poy cho mii kuyokwīyech “ompö Echotyön”.
- Piich chane cho netisiyi akīpöghisiyi ompö makata Töröröt.
- Möpöytonye poyi kanisa ompö ng'öghomnyeng'wa opin. Kikuyiti Töröröt kinetut nko kintaghoghat kīrip kegh nko manto ng'ölyontenyi.

- Kitor ng'at Paulö kimwa lö kikitö poy achey nyo chilenecha.



- Poru yenyu lö netöy, chichimoy, soghsoghoy akichil chane chona mi kanisa, ompö man kımikul akunet chane kipestegha mikulögh. Eprania13:7
- Otini kinet kighöni kikonyit akitech, kimwa ng'at Paulö lö mıchını kighönı kımany ompö

kalya chane nko chane.

- Mucho löne tökemong'öcha ompö kalya achane nko achane? Ompö kepestegha mikulögh, ompöwölo kalya kı okinto mikulögh.
- Kalatya 5:19-21, Netecha lö toyogh nko pesyogh kı poghısyewutpö por. Ato kipesteghecha por kırumu pesyogh ompö kanısenıcha. Kılennyona, konu mikulögh, kalya nko ghömıchö. Rumi 12:10,16-18, 1 Kor. 1:10, Epeso 4:1-3

B. Kikilöt

Akesoghokwa ng'at, tupchenıchu lö aneta piıch chole sosoön akiil piıch cho nyökoröch, a ang'arach piıch cho nyörkölöl, amıkukön nko piıch lapay. 1 Tesalonike 5:14

- Kichil Paulö piıch cho ghach cho kintöghoghtoy por. Mıchını keteghchini akechil piıch chole kighönı chona tökıpöytoy por kipa ng'at kimurtewon, kısıwa porwöyikwa lö konu meghat, atakıпка chane kınıyörı Linyogh nko Töröröt.
- Nkıtunö lö mentö kinetöy Paulö kintöghoghı opın wölo kinet kighönı löwır.
- Chii anka tikwil nyo sıwıyi tupchenıyi nyo tö kımı ompö por kimıchını kunan (kalatya 6:1)

- Nyo riptooy, kikir Paulö lö asaghsagha chane chona “nyörkölöle kinonsyewutkökwa.”
- Chona nyörkölöl ompö kinonsyewut kī chona soghsoghecha chane chona “nyörkölöle kinonsyewutkökwa”
- Chona nyörkölöl ompö kinonsyewut kī chona susöy kegh tya. Piich chane cho mökisiwiyicha wowinpö Töröröt nko sikonötenyi nyole nying’wa ompö Kristo, mii nyu chane kurosöy kömpölelut nko nyörilwok chopö söponwekwa (Söluut 42)
- Ompö kesaghsagh chane kīmichinech kenonchinö chane wowin pö Töröröt akenonchī ng’at wölo lata kristo. (Rumi 2:4)
- Kilö ng’at Paulö osyolan chona “nyörkölöle.”
- Chona nyörkölöle kī chane chona machīchimatnye ompö kighanat, liku chane lawel piich cho meghönotnye.
- Ompö kinonsyewutköcha chopö por kemukecha kerwokinö akemīn chane, wölo ompö mīkulögh, kemukecha kecham, kesyonchī akepīrchicha kekilo chane.
- Kilo ng’at Paulö “omīkukönö ompö piich lapoy”
- Ng’at mīkukönöt kī okinto mīkulögh. Kepatisana mīkulögh atökesikö mīkukönöt ompö piich lapoy.
- Kīlenyona ato kīpesteghecha por nko kinonsyewutköcho kemukecha kerosé akemīn piich cho susöy kegh lawel.
- Kimukecha kenana piich cho nyörkölöl lö mīngech. Wölo mökīpköchech lö kīgh nyo konu por kī kwolöto kegh anta kuyityi kegh man.
- Lenyenyoni mīkukönöto Töröröt ompö achaa ng’at nko ng’at otini kighecha ng’okī, otini mii mīkulögh nyo Tiliil kīkonecha otöp nyo pö Yeso, kemukecha tikwil ntokesīch kīsyonchin ompö piko walak.

Maker ghöghityö, nko ghöghityö wölo akanya kilikī machateng’wo nyo oghchini kegh nko piich lapay nyo karam. 1 Tesalonike 5:15

- Ato lelwecha chii, ompö kinonsyewutköcho chopö por, kïmörecha ketokisyone anta kïyokta kitakat lawel, wölo melö machata Töroröt nyoni ompö monechi.
- Machata Töroröt kï kenyoönchenöcha puku Rumi 6:6 – nyo lentöy kikeparta por kimurtöwon nko Kristo akechicha tyokote ompö paytaghtanyi, pöytonecha yee nyu mikulögh nyo Tiliil ompö (kinonutköcha, makatencha nko sirmoytöncha) akïpayta otöptöncha ompö parakuto pikö walak.
- Ompö mikulögh kenyorunecha owesyö nko machat nyo kichömo akesyonchï piich chona lelwecha.


Ong'örechenö kitenö osiis, asagh kitenö osiis, ayokyï Töroröt sörö ompö kïgh anka tikwil, machata Töroröt nyoni ompö akwa, otini kalikukwa pipö Kristo Yeso.

Momiis Mikulögh nyo Tiliil, masas ng'ala wekoyinön. Omukchinö tikwin lapay a akaman cho tenote akirö kegh ghöghityö anka tikwil. 1Tesalonike 5:16-22

- Kimwa Paulö lö ong'öröchan lasiny ng'örekyö nyo pö ori nyo kitïng'eto nyinte. Melö king'arach asistang'a ato karamach ng'ala. Ompö piich cho meghönötcha tikwil kïng'öreksot otinö kasiwa lö tenote tikwin ompö chane.
- Ekï lentöy nee köny atay mököchinotnye ng'ala anta tikit ompö achaa? Ato liku atay karamach ng'ala anta otöp nyo kïng'örekyonecha, kuporu nyoni lö tökimi kuntöghoghwecha por atökïpöywecha tikucha, melö mikulögh nyo tiliil (Epeso 5:20)
- Ng'örekyö kï okinto mikulögh nyo tiliil ato kïmitecha ompö mikulögh, kenyorunecha ng'örekyö kërkegh kömökaramacha ng'ala (Ighisyeut 16:22-25)
- Ompö por, kutöng'öy ng'örekyencha tiku ng'winy, wölo ompö mikulögh kutöng'öy ng'örekyencha linyogh nko Kristo (Rumi 8:35-39)

- Nyo ripto kī kimwa Paulō lö “asagha kīnomnyö” (Rumi 8:28-29)
- Pkonöy soghut atoswayta chii kegh Töroröt, nko ketwaytenacha kegh Töroröt ompö machatenyi nko kenkitunöcha nyinte lasiny.
- Kilenyona kirosatencha nyopö por nko ketwayta kegh tikwin anta piich. (Epeso 6:18, Yuda 20)
- Kilim Paulo kīmwa lö, ompö kīgh anka tikwil iyokyī Töroröt sörö ompöwölo machata Töroröt nyoni, kimwa ng’at lö ompö kīgh anka tikwil iyokyī Töroröt sörö (Epeso 5:20 kilo yokyinö sörö ompö tikwin lapoy.
- Ompöwölo kinkititecha Töroröt nko köromnyenyi nyona ighöy tikwin lapoy cho karamach ompö achaa nko ororyenyi. (Rumi 8:28-29)
- Ompöwölo swong’echa wowinto köromnyenyi, kī mömichinechanye ketomtomöne akimeghech mikulis ompö osiswo kömpölelut, wölo mīchinecha kesike nyakanat ompö Töroröt akenkītī lö mii Töroröt kwighecha ketena.
- Ompö por, kemökecha ketomtomöne ompö köromnyenyi (Cheramīya 29:11)
- Nyo riptooy kī kilo Paulō “Momiis Mikulögh nyo Tiliil.”
- Kemis kī kepir ompö acheytanyi anta pöghisyenyi akeghacha chole chicho opin.
- Kīpirecha nyu löne machatenyi? Kīpirecha ompö machata por.
- Nyinö kötökitwoytoy kegh mikulögh kunetech, kuntöghoghwech ompö man, wölo ompö por kemeno chireryenyo lö tökenkitunö man. Sirimunyi kesiköy nyu pkochin nyo gha nko kighanat nyo metenatnye.
- Kitas tagh Paulō kīmwa lö mesas ng’ala werkoyon.
- Otini kikir Paulō 1 Tesalonike, kitomönye kiting’eto kanisa ng’ölyonto Töroröt lasiny. Atomi nyu atokiropchī Töroröt piich ropöwo mikulögh nyo tiliil taking’or ng’ala man.
- Kesas chii nyo köpöghisyegho mikulögh nyo Tiliil king’alan man kī “kemis” mikulögh nko machatenyi nyona kömöröy kīmwa man anta king’ong’i man.

- Nyo röpöy kimwa Paulö lö “poru kegh tikwin löwir ompö köromnyö.”
- Otini kitomönye kënyorï kanisa ng’ölyonto Töroröt, kë kipoghisyo Töroröt werkoy kimwayta man. Ompö osiswechoni kimi piich cho kighöy kegh lö këchï werkoypö Töroröt, wölo kimenetöcha man. Kimwa Paulö ng’at lö kityömöy kighöni chopö Tesalonike kinetut anka tikwil, takisïwa lö ekï pö man anta ewo.
- Körökegh nko achaa ompö yee, mi piich cho netöy man, akïmi cho netöy putintön (2 petro 2:1-3)
- Nyo karam kepesteña ompö mikulögh akekït kinetut anka tikwil kërip kegh nko ng’ölyonto Töroröt. Ato möripönye kegh nko ng’ölyonto Töroröt nyinö kirate ompö man, këmichini këwirta kinetutchoni.
- Ato këpestecha ompö por, kelisecha lawel ompö kinetut chopö putintön.
- Kimwa ng’at Paulö lö opïstenö anaka wölonä mi onyöto.
- Melö makata Töroröt pat kële kelowitenocha kegh ghöghityo wölo machatencha tikwil kelowitenöcha kegh onyöt.
- Ompö nyu pöropcho Töroröt onkït nyo kimukecha tökelowit kegh nko ghöghityo.



Nya kutililokwa Töroröt lasiny nyo konu kalya; ompö oor anka tikwil akïrip portönkwa këmikul, mikulöwunkwa nko söpontönkwa, nko portönkwa; atalikuna piich cho puryö lelut atomïla Echotyontenyö Yeso Kristo. 1 Tesalonike 5:23

- Ng’ölyontoni lee “kitapanat anta löwönöt” kë kekïl anta ketïliil ompö pöghisyo Töroröt.
- Ompö kapkeynan nko Yeso, kë kïkekïlecha/ löwonecha atanye këkisörwecha, wölo nyu tösoy tagh mikulögh nyo Tïliil kwichöy poghisononi pö kitïliilöt osis lapoy ompö söponwecho.

- Mi nyinte kunetecha kepesteghena mikulögh kīrip kegh nko kapkeynanenyo nko kristo.
- Kitö anka nyo wow nyopö tösunöt nyo pöghisyegho mikulögh nyo tiliil ompö söponwecha kekaracha kegh nko Kristo kī sīng'ut nko kömpölelut.
- Mökimukechanye ntökekarkegh nko Kristo ato tomönye kepestenacha aketwayta kegh mikulögh nyo tiliil, akimökimukechanye ng'at ntoketwayta kegh mikulögh nyo tiliil atotökemitenöcha ompö por kwile. Poryot nko sīng'ut nyo poru lö mökimukechanye ntaketwayta kegh porwöyicho.

